

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj:01-02-22363/21
Sarajevo, 06.12.2021. godine

OPĆINA NOVI GRAD SARAJEVO

OPĆINSKI NAČELNIK

PREDMET: Vijećnička pitanja i inicijative, dostavlja se

Na 9. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

a) Vijećničke inicijative

-vijećnica Maja Muftić Dedović –

1. Podnosim inicijativu za sanaciju asfalta i postavljanje drenažnih cijevi u ulici Alija Prepoljac Cuni od broja 2 u dužini od cca 50 m, kao i izradu projektne dokumentacije ako je neophodna prije izvođenja pomenutih radova.
2. Pokrećem inicijativu prema Vladi Kantona Sarajevo da u budžetu za 2022. godinu predvidi sredstva za sufinansiranje projekta Izgradnja SRC "Zlatno polje" kod OŠ "Sokolje". U Naselju heroja Sokolje nema nijedan sportski sadržaj za djecu, tako da izgradnja SRC "Zlatno polje" predstavlja veliki projekat koji će biti od izuzetnog značaja.
3. U skladu sa zahtjevima građana MZ Naselje heroja Sokolje iniciram izgradnju sepeništa sa rukohvatima iz ulice Senada Čolića u ulicu Ibrahima Perviza u skladu sa regulacionim planom u dužini od 50 m.
4. Iniciram postavljanje pristupne rampe za invalidna lica – po zahtjevu istih na ulazima u zgrade na adresama: Trg ZANOBIH-a br.29 i br.1, kao i Nerkeza Smailagića na br.7 i br. 10.
5. U skladu sa zahtjevima građana MZ Naselje heroja Sokolje iniciram nabavku stolica za potrebe ove mjesne zajednice, tačnije 30 komada, kao i tri oglasne ploče.

-vijećnik Mehmed Karkelja –

1. Molim nadležnu službu da u najkraćem roku adekvatno obilježi pječački prelaz (postavljanje horizontalne signalizacije) te da se postave usporivači saobraćaja na prelazu sa pječačkog mosta na Otoci-Meandar i ulice Žrtava Fašizma.
Obrazloženje:Obzirom da veći broj naše djece najmlađih uzrasta dolaze iz pravca Otoka – Meandar u Osnovnu školu „Mehmedalija Mak Dizdar“ te da isti moraju preći i cestu prema ulici Žrtava Fašizma gdje se odvija vrlo intenzivan saobraćaj potrebno je odmah i bez odlaganja obilježi pječački prelaz (postavljanje horizontalne signalizacije) te postaviti usporivače saobraćaja a iz razloga zaštite djece od neodgovornih vozača te smanjenja i eliminacije mogućnosti saobraćajnih nezgoda.

2. Molim nadležnu službu da se spomenik ubijenim sugrađanima na području MZ Otoka ispred prostorija MZ Otoka adekvatno osvijetli.

Obrazloženje: Spomenik civilnim žrtvama rata na području MZ Otoka koji se nalazi ispred prostorija MZ Otoka je neosvijetljen i isti se u večernjim satima nalazi u potpunom mraku te nije zaštićen i uočljiv što je neprimjereno i nedopustivo te je kao takav podložan i mogućoj devastaciji i oštećenjima neodgovorih pojedinaca i grupa. S druge strane smatram da svi spomenici na području Općine Novi Grad pa tako i ovaj trebaju biti adekvatno osvijetljeni i uređeni.

3. Da se iz dvorišta Osnovne škole Mehmedalija Mak Dizdar uklone devastirani ostatci spomen ploča civilnim žrtvama rata sa područja MZ Otoka.

Obrazloženje: Obzirom da je napravljen novi spomenik ubijenim sugrađanima na području MZ Otoka ispred prostorija MZ Otoka a stari spomenik koji se nalazi u dvorištu Osnovne Škole „Mehmedalija Mak Dizdar“ je u prilično lošem stanju i devastiran molim da se isti ukloni što je ujedno i zahtjev Savjeta MZ Otoka.

4. Da se u ulici Oslobođilaca Sarajeva na mjestu ubistva-masakra devetero naših sugrađana gdje se nalazi spomen ploča sa datumom i opisom događaja dodaju imena i prezimena mučki ubijenih naših sugrađana. (Seida Baličević, Osman Hebibović, Emin Kolar, Enver Mustagrudić, Muškija Pribinja, Mirsad Spahić, Selima Spahić, Aiša Šito i Jadranka Tendžera).

Obrazloženje: Na molbu i zahtjev porodica i rodbine ubijenih naših sugrađana molim nadležnu službu da se u ulici Oslobođilaca Sarajeva gdje se nalazi spomen ploča sa opisom događaja - ubistva devetero naših sugrađana napišu i imena i prezimena ubijenih tog dana. Obzirom da je spomen ploča malih dimenzija i postavljena nisko na postolju potrebno je uraditi veću ploču i postolje sa identičnim tekstom uz dodatak imena i prezimena ubijenih tog dana.

-vijećnik Elvis Hodžić-

1. INICIJATIVA ZA rješavanje problema odlaganja smeća na lokaciji Boljakov potok na križanju ulica Smaje Šikala i Ragiba Džinde

Obrazloženje: Na pomenutom lokalitetu (raskrsnici) stvara se mala deponija, raskrsnica je nepregledna, a prostor za odlaganje je nedostatan. S tim u vezi, predlažem da se organizuje novi prostor za odlaganje. Obzirom da je Općina kupila 2 lokacije u neposrednoj blizini, predlažem da se dio tog prostora iskoristi za rješavanje pomenutog problema.

Građani godinama trpe ruglo u centralnom dijelu svog naselja.

Smatram da ovaj problem treba rješavati po hitnom postupku.

2. INICIJATIVA ZA rješavanje problema odlaganja GRAS-ovih otpad vozila

GRAS-ova u krugu GRAS-a predstavljaju vrlo ružnu sliku iz ulice Džemala Bijedića, stoga molim nadležne da od strane ceste i naselja Miljacka postave vizuelnu barijeru kako se taj jad i čemer ne bi vidio te kako bi naša sramota bila manja. Etažni vlasnici stanova u naselju Miljacka su skupo platiti stanove te nisu dužni u svojoj neposrednoj okolini gledati ovo ruglo.

Molim za što hitnije rješavanje ovog problema.

3. Podnosim inicijativu za obnovu obilježja ubijenim civilima na Otoci, u ulici Žrtava Fašizma, iz razloga jer je istoo u katastrofalnom stanju što je nedopustivo i ispod svake časti i poštovanja prema žrtvama kao i porodicama istih.

-vijećnica Nejra Džanko –

1. Podnosim inicijativu prema KJKP "Rad" da se ulica Rudija Alvađa broj 16, 18 i 20 (zgrada RVI) uvrsti u ručno održavanje i čišćenje u toku zimske sezone.

2. Podnosim inicijativu da se dužinom ulice Bana Mateja Ninoslava postavi jedan usporivač saobraćaja.

-vijećnica Enisa Spahić-

1. Inicijativu za transparentniju, efikasniju, lakšu, bolju i bržu e- komunikaciju mjesnih zajednica i građana Općine Novi Grad

Obrazloženje prijedloga inicijative: Tražili smo da svaka mjesna zajednica ima pristup internetu, ali ne da isključivo služi internoj komunikaciji članova savjeta i općinskih službi, nego i ono što je i najvažnije lakša i jednostavnija komunikacija sa građanima. Nažalost pojedine mjesne zajednice i dalje funkcionišu po principu isključivo fizičkog kontakt „ Ako šta imaš napiši i predaj sekretaru/ki mjesne zajednice“, isključujući druge vidove komunikacije, i na taj način uskraćujući većini građana aktuelnu informaciju te ravnopravno sudjelovanje u donošenju prijedloga, sugestija, kritika na teme koje su itekako važne za građane. Naravno, imamo i jako dobrih primjera kao što su mjesne zajednice Alipašino polje B-I I BII. Molimo nadležne da poduzmu sve neophodne mjere kako bi poboljšali e-komunikaciju članova savjeta mjesnih zajednica sa građanima putem internet kanala, društvenih mreža, online komunikacije uopšte. Facebook stranice mjesnih zajednica Općine Novi Grad ne služile svrsi, odnosno lakšoj i bržoj komunikaciji sa građanima. Na Fb stranicama trebaju se objavljivati jasne, tačne i aktuelne informacije, pozvati građane da daju svoje prijedloge, sugestije, mišljenje, naravno i kritike posebno ako su u pitanju prijedlozi nacrtu budžeta.

2. Inicijativu za dostavljanje Odluke o sanaciji krovova, fasada i liftova na području Općine Novi Grad

Obrazloženje prijedloga inicijative: S obzirom da je veći broj naših sugrađana izrazio sumnju u primjenu parametara po kojima se radi lista prioriteta objekata kolektivnog stanovanja kada je riječ o sanacijama krovova, fasada i liftova. Molim da nam se dostavi Odluka o sanaciji krovova, fasada i liftova na području Općine Novi Grad, a koju je usvojilo Općinsko vijeće, radi eventualnih sugestija, korekcija i dopuna.

3. Inicijativu za iznajmljivanje prostora Udruženju „Oaza“ u dijelu nesaniranog objekta Sportsko-rekreativnog centra „ Safet Zajko“ Halilović

Obrazloženje prijedloga inicijative:

Jedan od strateških pravaca Udruženja „Oaza“ je sport i sportska rehabilitacija. Trenutni prostorni kapaciteti ne pružaju mogućnost da sprovedu bilo kakve sportske sadržaje. Obzirom da se radi o posebno osjetljivoj populaciji našeg društva, za optimalan rad neophodan je adekvatan prostor i ambijent, zahtjev i potreba se temelje i na UN konvenciji o pravima osoba sa invaliditetom.

Gotovo sve aktivnost koje sprovedu su na području Općine Novi Grad, trenutno koriste:

Sportsku dvoranu Ramiz Salčin, Olimpijski bazen Otoka, stonoteniska dvorana O.Š. Umihana Čuvidina, Sportska dvorana Dobrinja i Centar za edukaciju sport i rekreaciju „Safet Zajko“ koju koristi više od 50 članova Udruženja skoro svakodnevno.

Zbog udaljenosti sportskih objekata od prostorija Udruženja članovi često imaju problem prijevoza.

Udruženje „Oaza“ ostvarilo je zapažene sportske rezultate u proteklih deset godina, kako na domaćoj tako i na međunarodnoj sportskoj sceni.

- Učesnici Ljetnih Specijalnih Olimpijskih igara u Belgijiskom Antverpenu 2014. godine i ostavili zapažene rezultate i to: zlatna medalja (atletika) i srebrna medalja (plivanje).
- Učesnici Malmo Opena 2014. Švedska. Najveće takmičenje za osobe sa invaliditetom nakon Paraolimpijskih igara sa tradicijom održavanja od preko 40 godina. Na navedenom takmičenju osvojen je zapažen rezultat i to srebrna medalja u malom nogometu u vrlo jakoj konkurenciji.

- Učesnici na Ljetnim Specijalnim Olimpijskim igrama u Los Angelesu 2015. i osvojene su tri medalje: zlatna medalja u plivanju, srebrna medalja atletika i bronazana medalja u stonom tenisu.
- Učesnici na Zimskim Specijalnim Olimpijskim igrama 2017. u austrijskom Šladmingu i osvojene dvije zlatne medalje u slalomu i veleslalomu.
- Učesnici Malmo Opena 2018. gdje su naši takmičarti ostvarili odlične rezultate: osvojena zlatna i srebrna medalja u stonom tenisu.
- Učesnici na Ljetnim Specijalnim Olimpijskim igrama 2019. u Abu Dhabi_u i osvojene dvije srebrene medalje u stonom tenisu u konkurenciji parova i pojedinačno.
- Članovi Udruženja “Oaza” su višestruki prvaci SO BiH u nogometu, košarci, boćanju, plivanju, stonom tenisu, atletici i td.

Aktivno promovišu primjere dobre prakse, podrške i saradnje sa različitim sudionicima, nastojeći obezbjediti bolji položaj osoba sa intelektualnim teškoćama u društvu. Svojim radom zavrijedili su podršku za ovu inicijativu, tako omogućavaju kvalitetniju i neophodnu podršku osobama sa intelektualnim teškoćama poštivajući sva prava zagarantovana UN Konvencijom o pravima osoba sa invaliditetom.

Prostorije u Centru „Safet Zajko“ bi uveliko olakšale dostupnost sportskim sadržajima, a i sam boravak bio bi značajno ugodniji. Sport i sportska rekreacija su se dobro pokazali kao instrument za poboljšanje opšteg zdravstvenog stanja članova Udruženja.

Ovakva i slična udruženja, sa kojima imaju međunarodnu saradnju, nalaze se u sličnom ambijentu kao što je Centar „Sefet Zajko“, u prizemnim objektima prilagođenim osobama sa invaliditetom.

Smatram da bi prostor u Centar za edukaciju sport i rekreaciju „Safet Zajko“ pružio sve naophodne resurse kako bi mogli unaprijediti rad i članovima ponuditi adekvatne edukativne, sportske, kulturne, zabavne i sve druge sadržaje.

4. Inicijativu u mjesnoj zajednici Staro Hrasno

Obrazloženje prijedloga inicijative: Na zahtijev većeg broja građana mjesne zajednice Staro Hrasno molim da se što hitnije: Obnove stepenice koje vode od pasaža iz naselja prema Malezijskom mostu. Ogradi zelena površina desno od stepenica zbog kontinuiranog gaženja trave i stvaranja nepotrebnih staza kratica te uredi hortikulturnim uređenjem, odnosno cvijetnim plohama.

Urediti zidiće dječijeg parka, odnosno prefarbati hidrofobnom sivom bojom, masnom bojom preko koje se ne može koristiti sprej niti bilo koja druga boja na bazi vode, kako bi se konačno stalo u kraj ctranju grafita, murala i poruka kojima tu nije mjesto.

-vijećnica Elza Gaković-

1. Na osnovu zahtjeva građana iz ul: Antuna Branka Šimića a tiče se velikog parka na datoj lokaciji, pokrećem inicijativu da se ogradi dio parka za vlasnike kućnih ljubimaca u odnosu na plohu parka gdje borave djeca.

2. Pokrećem inicijativu da se zbog smanjene preglednosti u ulici Zaima Imamovica od broja 1 do broja 23 te otežanog priključenje na glavnu cestu postavi ogledalo.

3. Pokrećem inicijativu da se na lokaciji Trg Nezavisnosti 28, na postojeći broj parking mjesta osoba sa invaliditetom doda još jedno mjesto sa tom namjenom. Također iniciram postavljanje vertikalne signalizacije te označavanje parking mjesta osoba sa invaliditetom.

-vijećnik Mirza Memišević-

1. da se ulica Nusreta Aganovića 82 i brojevi u blizini uvrsti u program zimskog održavanja.

2. da preduzeće “Rad” započne odvoz smeća iz ulice Nusreta Aganovića 82 i brojevi u blizini. Stanovnici ove ulice dobivaju račune za odvoz smeća ali su primorani smeće nositi do

najbližeg kontejnera.

3. kada preduzeće “Rad” planira obnoviti garaže u naseljima Dobrinja i Vojničko Polje?

4. Da li je Služba Općinskog vijeća primila poziv za obilježavanje godišnjice stradanja u Kalinoviku i ako jeste zašto taj poziv nije upućen svim vijećnicima kao što je to praksa? Na ova pitanja sam dobio odgovor i nije potrebno ponavljati isti. Međutim, na sljedeća pitanja nisam dobio odgovore te vas molim da ista prosljedite Predsjedavajućem Općinskog vijeća:

Da li je na spomenuto obilježavanje otišlo rukovodstvo ili dio rukovodstva Općinskog vijeća ili neki drugi vijećnici i na koji način je napravljen odabir vijećnika koji su išli na obilježavanje? Da li vijećnici koji su išli na obilježavanje službenim vozilom isti dan bili i selu Umoljani, koje i nije tako usputno mjesto na relaciji Kalinovik - Sarajevo i obrnuto. Kojim povodom su, ako su bili, posjetili Umoljane?

-vijećnik Vernes Ćosić-

1. INICIJATIVA ZA HORTIKULTURALNO UREĐENJE ZELENE I POSTAVLJANJE SPRAVA ZA STREET WORKOUT PARK NA ZELENOJ POVRŠINI IZMEĐU C5 I DOBRINJE 1

Obrazloženje prijedloga inicijative: Nedavno su ova naselja povezana pješačkom stazom. Velika frekventnost ljudi koji je koriste ide u prilog korisnosti fizičkog povezivanja ovih naselja. Pored hortikulturalnog uređenja predložio bi i izgradnju parka sa klupama u sklopu kojeg bi bile i sprave za street workout park. Street workout je kombinacija gimnastike i akrobatike na otvorenom ili zatvorenom prostoru, prilikom čega se koriste elementi već postavljeni u prostoru – šipke i sprave u parkovima, igralištima i na drugim lokacijama.

2. INICIJATIVA ZA IZRADU RAMPE ZA PRISTUP INVALIDSKIM KOLICIMA VISOKOM TROTOARU U UL. SAFETA HADZICA (TROLEJBUSKA STANICA U SVRAKINU)

Obrazloženje prijedloga inicijative: Predpostavljam da nije prvi put da se traži prilagođavanje ovog neobično visokog trotoara (preko 30cm) što ga čini neprelaznom preprekom invalidima, ali koji predstavlja problem i za starije, trudnice i majke sa djecom. I to na mjestu koje ima svakodnevno veliku fluktaciju sugrađana. Apelujem na Općinske službe da u što kraćem roku iznađu rješenje kako bi se izgradnjom invalidske rampe ovaj zbog svoje pozicije opasan pločnik osigurao i prilagodio za sve naše sugrađane.

-vijećnik Adnan Gušo-

1. Pokrećem inicijativu da Službe Općine Novi Grad Sarajevo upute dopis prema Službi Kantona Sarajevo u vezi videonadzora na području Općine. Općina je već uradila pripremu i čeka se saglasnost i način na koji će učestvovati Kanton Sarajevo (finansijski i projektno).

2. Pokrećem inicijativu da se finansijska sredstva koja se već dvije godine obezbjeđuju u Budžetu Općine za ugradnju navodnjavanja stadiona Otoka preusmjere JP „LOKOM“, da oni navedeni projekat izvrše.

Tražim izjašnjanje Općinskog vijeća.

3. U odgovoru na inicijativu u vezi parkiranja automobila u ulici Olimpijska br. 36.38.,40.,42., i 44., nije traženo kako ste naveli u odgovoru da imaju riješeno parkiranje, već predstavnici traže da se ne parkira ispred tih ulaza i da se interveniše u saradnji sa IV Policijskim upravom. Postoji smetnja pri pristupu ulazima djece, invalida, starih osoba.

-vijećnici Adnan Gušo i Kenan Kolašinac-

1. Da se planiraju sredstva u Budžetu Općine Novi Grad sarajevo za 2022. godinu u iznosu od 30.000 KM za sufinansiranje projekta WEMapp.

Obrazloženje: WeMapp je platforma i aplikacija za navigaciju u potpunosti prilagođena različitim motornim sposobnostima bazirana na lokalnoj zajednici. To je platforma koja pomaže osobama s poteškoćama u kretanju da se sigurno i neovisno kreću bilo kuda mapiranjem najboljih ruta za njih u bilo kojem gradu. WeMapp je orijentiran na kretanje mape koja sadrži detekciju prepreka i pristupačnosti i pruža persolinizirane rute temeljene na motornoj sposobnosti.

2. Savjet MZ „Naselje heroja sokolje je početkom 2012. godine pokrenuo inicijativu za proširenje pristupnog puta iz rajlovca do ovog naselja i to ulicom Senada Čolića Nadležna služba je od sedam vlasnika otkupila potrebno zemljište i uknjiženo je kao vlasništvo Općine. Jedna vlasnica (Š.Ranka) nije htjela da proda oko 180m² kako bi time bila završena eksproprijacija. Tražimo od Pravobranilaštva Općine da što prije riješe predmet jer je prošlo 10 godina od inicijative.

-vijećnik Hadžan Konjo-

1. Pokrećem inicijativu da se u Budžetu Općine Novi Grad Sarajevo za 2022. godinu obezbijede sredstva da se naknada porodiljama koje nisu u radnom odnosu poveća iznos sa 50,00 KM na 100,00 KM mjesečno i to 12. mjeseci.

(Inicijativa usvojena od strane Općinskog vijeća uz koju je usvojen i zaključak da Općinsko vijeće traži od nadležnih kantonalnih organa da izjednači naknade porodiljama koje su u radnom odnosu i one koje nisu u radnom odnosu).

2. Pokrećem inicijativu da se najboljim učenicima i studentima na području Općine Novi Grad Sarajevo dodijele stipendije bez obzira na materijalni status roditelja.

(Inicijativa usvojena od strane Općinskog vijeća)

-vijećnica Edina Gabela -

1. Predlažem da se u Budžetu za 2022. godinu uvrsti 50 000 KM za izgradnju Muzeja 505. viteške brigade.

Obrazloženje: U Bužimu je položen kamen temeljac za izgradnju Muzeja 505. viteške brigade. Planiran je na zemljištu na kojem se nalazi Turbe generala Izeta Nanića i svih poginulih pripadnika brigade. Procijenjeno je da će kompletan projekat koštati više od milion KM. Veliki broj lokalnih zajednica je dao podršku ovom projektu. Obzirom da smo i mi lokalna zajednica koja čuva historiju od zaborava kroz izgradnju i očuvanje spomen obilježja, muzeja, podrške udruženja koja okupljaju boračku populaciju. Smatram da bi podrška projektu bio naš mali doprinos u sjećanju na poginule za slobodu u kojoj mi živimo.

2. Savjet MZ Alipašino polje A2 proveo je peticiju među građanima za uklanjanje ograde kod ASA osiguranja na Alipašinom polju.

3. Pokrećem inicijativu da nadležne općinske službe zajedno sa Ministarstvom saobraćaja Kantona Sarajevo vide mogućnost da se između trolejbuske okretaljke na Mojmilu i katoličke crkve izgradi kružni tok zbog ogromnih gužvi u tom dijelu općine.

-vijećnica Edita Šandal-

1. U ime građana sa područja MZ „Dobrinja A“ pokrećem inicijativu za rješavanje problema u saobraćaju u ulici Senada Poturka Senčija koji su nastali izgradnjom pješačke staze odnosno trotoara na spoju ulice sa ulicom Braćom Mulić zbog postojanja ruševnog objekta na samom spoju koji je prouzrokovao suženje puta za 1 metar. Objekat je srušen te su se stekli uslovi da se ulica u tom dijelu proširi za cca 10 metara i time bi se olakšalo građanima i motornim vozilima

2. Pokrećem inicijativu da se oštećeni usporivači saobraćaja u ulici Braće Mulić uklone ili vrate u prvobitno stanje

-vijećnik Silvije Kristić-

1. Pokrećem inicijativu da se u OŠ „Džemaludin Čaušević obnovi dotrajali krov na fiskulturnoj sali ili izgradi nova fiskulturna sala. Inicijativu sam ranije podnosio te smatram da je ista veoma važna za učenike ove škole.

-vijećnica Aida Ožegović-

1. Uređenje parka u ulici Gandijeva i izmještanje biciklističke staze

Obrazloženje:

Podnosim inicijativu za uređenje parka, na način dopune mobilijarom, u ulici Gandijeva. Kroz navedeni park, sredinom, prolazi biciklistička staza što je opasnost za djecu koja ga koriste te vam se obraćam sa zahtjevom za izmještanje staze na vanjski dio igrališta. Park se nalazi na plohi koju bi trebalo preorati i izravnati zbog neravnina koje su dodatna opasnost za djecu.

2. Uvrštavanje u redovno održavanje korita i obale rijeke Dobrinje između ulica Gandijeva i Petra Tiješića

Obrazloženje: Korito rijeke Dobrinja kao i obale, iza ulice Gandijeva se neredovno čiste te podnosim inicijativu da se održavanje navedenog uvrsti u redovno održavanje parkova i korita rijeka. Obale su zarasle u nisko šiblje i rastinje te se u ljetnom periodu mogu vidjeti zmije na obali a u blizini se nalazi dječiji park što izaziva strah i zabrinutost kod roditelja.

3. Izgradnja i postavljanje spomen obilježja u ulici Safeta Hadžića na broju 94.

Obrazloženje: Na navedenoj adresi 15.7.1992. godine, od granate ispaljene sa agresorskih položaja, su poginule 3 osobe Tomović Vido, Tomović Milo i Dobrača Kimeta, a ranjene su 4 osobe. Članovi porodica poginulih su mi se kao vijećnici obratili sa zahtjevom za podnošenje inicijative za postavljanje spomen obilježja.

-vijećnik Adi Škaljić-

1. Obzirom da na području Općine Novi Grad Sarajevo živi veći broj slabovidnih osoba zbog blizine Centra za slabovidnu djecu i omladinu i društva za zapošljavanje slabovidnih osoba pokrećem inicijativu da se na području Općine izgradi što više taktilnih traka u pješačkim zonama i da se dovede u funkciju zvučna signalizacija na semaforima.

-vijećnik Abel Baltić-

Pokrećem inicijativu da se u MZ „Dobrinja D“ most na rijeci Dobrinjka da ime „Most spasa“

-vijećnik Adi Pljevljak-

Pokrećem inicijativu da se u ulici Trg Nezavisnosti br. 25 obilježi parking mjesta za invalide obzirom da na trenutnom parkingu ne postoji dovoljan broj obilježenih parkinga za invalide. Tražim i da se pored obilježenih parking mjesta za invalide postavi i znak zabrane za parkiranje osim invalidnih osoba, jer se često dešava da drugi građani parkiraju na navedenim mjestima. U ulazu br. 25 živi invalid koji nema oba donja ekstremiteta te mu predstavlja veliki problem kad nema parking mjesto blizu ulaza.

**SEKRETAR
OPĆINSKOG VIJEĆA**

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a